

## **NA SERE TOTOKA NEI MERI NA TINANA NA GONE-TURAGA**

(Luke 1: 46 – 55)

Rev. Dr. I.S.Tuwere.

Sa ulutaga levu na Sere. Na sere kecega ni dua na vanua ka vaka kina na kena meke. Koto kina na italanoa me baleta edua na ka e yaco se vakayacori ka vaka kina na italanoa ni noda bula na tamata se talanoa me baleta edua na vanua. Sere kecega ka ra biuta vata se bulia na dau-ni-sere. Sa dua na ulutaga levu ka ulutaga bibi talega na ‘Sere’ ena noda Vakabauta na Lotu Va-Karisito, vakabibi na Lotu Wesele. Cavuti koto ena ikabakaba ni sere na MHB ena kena *Preface - “Methodism was Born in Song”*.

Ulutaga levu ni vei-Sere taucoko ni Lotu Wesele ka rau biuta vata na veitacini ko Jone kei Jalesi Wesele na tacina me tekivu mai na 1730 vakacaca na yabaki sa ikoya na *“Loloma-Levu-Taumada-Soli-Wale ni Kalou”* (Prevenient Grace of God). Na Nona vakacaucautaki ka vakavinavinakataki na Kalou. Cavuti ka seretaki vinaka kina na Nona Loloma levu na Kalou. Mai tomana eso tale na dau-ni-sere na ulutaga levu oqo ena 1840 me vakataki George Matheson (1842-1906). Dua na nona sere na: *“Loloma levu ni Kalou. Sa bese tu ni laivi au” – FHB (183)...O Love that wilt not let me go”*.

Tubutubu nei Jone kei Jalesi Wesele ko Samuela kei Susana Wesele. Ratou lewe 19 taucoko na luvudrau. Lewe 9 ratou a mate ka vo ga e lewe 10 na veitacini. Ena 9<sup>th</sup> February 1709, a kama kina na nodratou vale mai Epworth, Igiladi, ni se qai yabaki 6 ga ko Jone Wesele. Sa qai laki kau mai ko koya mai na taba vale e cake ka tiko kina. Ka veivakurabuitaki na nona vakabulai. Na sere ni nona vakabulai oqo ko Jone Wesele a bulia ko Jalesi na tacina ena 1738, ni sa yabaki 29 ko Jone Wesele ka kunei ena MHB 361 (Raica talega na Sakaraia 3:2).

*Where shall my wondering soul begin?*

*How shall I all to heaven aspire?*

*A slave redeemed from death and sin,*

*A brand plucked from eternal fire,*

*How shall I equal triumphs raise,*

*Or sing my great Deliverer’s praise?*

E seretaki koto na Loloma-Levu-Soli-Wale ni Kalou (Prevenient Grace of God) ena sere oqo, me vaka ena vuqa sara na Sere ni Lotu Wesele e vuravura raraba. Sa dua na itavi levu ena loma ni noda Lotu edaidai na kena lagati, ka me lagati vinaka na Sere ni lotu.

### *Ilisapeci kei Meri*

O Ilisapeci na tinai Joni na Dau-veipapitaisotaki ka rau veiwekani voleka sara kei Meri na tinai Jisu. Marautaki Meri ko Ilisapeci ni sa kila ni tiko vua na gone yalataki ka iVakabula ko Jisu Karisito. Mai sikovi Ilisapeci ko Meri. Rau veimarautaki ni sa tiko ruarua vei rau na gone...Joni vei Ilisapeci na tinana... kei na Gone Turaga ko Jisu...vei Meri na tinana. Sucu e liu ko Joni...sa qai sucu e muri nai Vakabula. O Joni eda raica ni vaka e liu mai vei rau me mai samaka na 'sala' me qai muri mai na Gone Turaga. Kaya cake ko Ilisapeci vei Meri ni rau sota: *“Ko sa kalougata vakalevu mai vei ira kece na yalewa, ka sa kalougata talega na lewe ni ketemu!* (Luke 1: 42).

### *Na Sere nei Meri*

Sa koto na Sere nei Meri ena Luke 1: 46-56. Sa dau vakatokai na wase ni Vola oqo nei Luke me “Sere nei Meri” (Song of Mary) se *Magnificat*...(magnify)...Na Nona vakalevulevui ka vakavinavinakataki na Kalou. Sa sega walega ni Sere nei Meri, ia sa Sere rogo levu ka bibi ni Lotu Va-Karisito mai liu me yacova mai edaidai.

### *Na veitikina bibi ena Sere oqo*

*“Sa vakalagilagia na Turaga na yaloqu, ka sa reki na yaloqu vua na Kalou na noqu iVakabula”* (vss. 46-70). Sa ka bibi na “vakavinavinaka” – na noda marautaka na Nona loloma-levu-soli-wale na noda Kalou. Kaya tiko na Dau-

ni-Same: *“Dou ia vei Jiova na vakavinavinaka. Mo vakavinavinaka vei Jiova na yaloqu. Niu sa bula tiko kau na vakavinavinaka vei Jiova; kau na sere vua na noqu Kalou ena gauna kecega kau sa bula kina”* (Same 146: 1 – 2).

*“Sa dodoka na ligana kaukauwa ka ra sa veiseyaki na viavialevu ena vakanananu ni yalodra”* (Luke1: 51). Sa yaco ka vakayacori tikoga na ka oqo mai liu me yacova mai edaidai. *“Sa talaraki ira na kaukauwa mai na nodra itikotiko vakatui, ka laveti ira cake na tamata lalai”* (vs. 52). Sa yaco tikoga na qaqa ni sere oqo e vuravura edaidai. *“Sa vakamamautaki ira na viakana ena ka vinaka; ka vakatalai ira wale na vutuniyau”* (vs. 53). Sa sega vakadua ni vakabekataki na tikina oqori.

Eda yacova mai na vula ko Noveba ka cabe mai vakamalua na Tiseba, na vula namaki ka marautaki. Eda vakananuma tale kina na Nona sucu na noda iVakabuala ko Jisu Karisito. Meda sere, vakavinavinaka ka marau tiko me vaka ka liutaki keda kina ko Meri na marama-tinana na iVakabual kei vuravura. Meda vakasinaiti talega ena yalo dau-vosota kei na Masu: *“Moni qai vosota toka mada gona kina, oi kemuni na wekaqu, me yacova na lako mai ni Turaga. Ni bau raica mada na dauteitei, ni sa waraka na vuata talei ni nona qele, ni waraka tu vakadede ka yacova ni sa tau oti na uca taumada kei na uca e muri. Ni wawa talega vaka kina! Ni vakataudeitaka na yalomuni, ni sa roro mai na lako mai ni Turaga”* (Jemesa 5: 7 – 8).

Me noda vata kece na kalougata kei na marau ni Siga ni Sucu ena yabaki oqo.

-----

